

**NO. SOALAN: 67**

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**  
**DARIPADA : DATO' SERI TIONG KING SING**  
**[BINTULU]**  
**TARIKH : 1.8.2017 (SELASA)**

**Dato' Seri Tiong King Sing [Bintulu] minta MENTERI  
PERDAGANGAN DALAM NEGERI, KOPERASI DAN  
KEPENGUNAAN menyatakan;-**

- (a) apakah usaha Kementerian dalam memastikan barangan kawalan di seluruh negara terutamanya di Bintulu sentiasa mencukupi dan bagaimanakah kerja pemantauan tersebut dijalankan; dan
- (b) apakah tindakan kawalan jangka panjang yang dikenakan kepada peniaga yang tidak mematuhi struktur harga barangan yang ditetapkan.

## JAWAPAN

Tuan Yang Di-Pertua,

Kementerian ini sentiasa mengambil langkah-langkah proaktif bagi memastikan barangan kawalan di seluruh negara termasuk di Bintulu sentiasa mencukupi dengan menjalankan **pemeriksaan dan pemantauan yang rapi dan menyeluruh** ke atas semua barangan kawalan.

Pemantauan yang dijalankan merangkumi pemeriksaan secara fizikal di peringkat pengilang, pemborong dan peruncit selain pemantauan melalui pelaporan harian dan bulanan, pemeriksaan buku stok dan naziran yang dijalankan secara berkala. Sehubungan itu, hasil pemantauan ini akan digunakan bagi mengatasi sebarang masalah kekurangan barangan kawalan di pasaran.

Selain pemeriksaan secara fizikal oleh pegawai penguatkuasa, Kementerian juga turut mendapatkan bantuan pengguna untuk menjadi mata dan telinga Kementerian melalui program seperti **'Friend Of KPDNKK'**, **Skwad Pengguna, Penghulu dan Ketua Masyarakat**.

Harga ditentukan oleh **pasaran** kecuali bagi beberapa barangan menjadi barang keperluan utama pengguna. Selain itu, Kementerian juga turut melaksanakan **Skim Kawalan Harga Musim Perayaan** bagi memastikan harga barangan tertentu tidak melonjak naik pada musim perayaan. Skim ini merupakan satu kaedah untuk menyekat kenaikan harga yang tidak munasabah akibat permintaan tinggi semasa musim perayaan. Di luar tempoh masa skim kawalan harga musim perayaan, **harga ditentukan melalui faktor permintaan dan penawaran** di dalam pasaran.

Sekiranya ada peniaga yang tidak mematuhi struktur harga yang telah ditentukan oleh Kerajaan, tindakan perundangan akan diambil dibawah Akta Kawalan Harga Dan Antipencatutan 2011 dan Akta Kawalan Bekalan 1961. Tindakan-tindakan yang akan dikenakan termasuk **kompaun dan pendakwaan di mahkamah** bagi kesalahan peniaga yang **ingkar meletakkan tanda harga** pada barangan yang dijual, **menjual barangan harga terkawal melebihi harga maksimum** dan peniaga yang melakukan kesalahan **gagal atau enggan membekalkan barangan** untuk dijual.